

## Allannguutissatut siunnersuut

## uunga

**Uunga siunnersuut: Umiarsualiviit pillugit Inatsisartut inatsisaat nr. xx,  
xx.xxxxx 2015-imeersoq**

Pingajussaanneerinissamut Naalakkersuisunit saqqummiunneqartut

## § 12-imut

**1. § 12, imm. 1** imatut oqaasertalerneqassaaq:

”Naalakkersuisut akuersissutini § 5, imm. 1 tunngavigalugu piumasaqaatinik aalajangersaasinnaapput, ilanngullugit inuussutissarsiummik ingerlataqartut umiarsualivimmi periarfissaqartinneqarnissaasa aamma inuussutissarsiummik suliaqarnissamut periarfissaqartitsinissap qulakkeernissaanut pisussaaffeqarneq, akuersissutininik atorunnaarsitsisarneq, akuersissutininik utertitsisarneq, umiarsualivimmik sanaartugartaqartumik taassumaluunniit ilaanik matusinermut imaluunniit piiaanermut aningaasartuutininut qularnaveeqqusiissuteqartarneq pillugit atugassarititaasut.”

## § 25-imut

**2. § 25, imm. 1** imatut oqaasertalerneqassaaq:

”§ 12, 14 aamma 15 naapertorlugit taliffissamik innersuunneqarneq, usilersornermi usingiarnermilu ikiorserneqarneq kiisalu umiarsualivimmi inuussutissarsiummik suliaqarnissamik periarfissaqarnissaq pillugit aalajangiinerit Naalakkersuisunut naammagittaalliutigineqarsinnaapput.”

## § 31-imut

**3. § 31, imm. 1** imatut oqaasertalerneqassaaq:

”Inatsisartut inatsisaat 1. juni 2015-imi atortuulersinneqarpoq. Tamatumunnga peqatigitillugu Namminersornerullutik Oqartussat umiarsualiviinik sanaartorneq, aserfallatsaaliineq, ingerlatsineq il.il. pillugit Inatsisartut peqqussutaat nr. 4, 29. oktober 1999-imeersoq atorunnaarsinneqarpoq.”

## Allannguutissatut siunnersuummut nassuiaatit

**Nassuiaatit nalinginnaasut**

1. Allannguutissatut siunnersuut Sanaartornermut Ataatsimiititaliap isumaliutissiissutaa ulloq 16. maj 2015-imeersoq malitseqartillugu saqqummiunneqarpoq. Isumaliutissiissut inatsimmi marlunnik allannguuteqartitsinissamut pissutissaqalersitsisimavoq, § 12 umiarsualiviutileqatigiiffinnut akuersissutinut atugassarititaasut pillugit aamma § 25 naammagittaalliorsinnaaneq pillugu.

2. Nassuiaatit nalinginnaasut kalaallisoortaa aamma danskisoortaa, kapitali 6-imi imikkoortumi siullermi Innuttaasunut sunniutaasussat, oqaatsitigut assigiinngitsut, Sanaartornermut Ataatsimiititaliap allakkani 8. april 2015-imeersuni Naalakkersuisunut eqqumaffigeqquaa.

Danskisoortaa oqaasertai eqqortuupput. Kalaallisoortaa allanngortinneqassaaq, taamaalilluni ”akit annikitsumik qaffaateqarnissaat” naatsorsuutigineqartariaqartoq allassimalerluni.

Nassuiaatit nalinginnaasut. Kapitali 6-imi immikkoortoq siulleg, Innuttaasunut sunniutaasussat, imatut oqaasertalerneqassaaq:

Suliap pissusissamisoornerani umiarsualivimmik nunami sanaartugartaqartumik atuinnermut akiliuteqarnissamut akiliisitsisalerneq nutaaq sunaluunniit atuisunut aningaasartuuteqarnissamik malitseqartarpoq. Inuussutissarsiortut umiarsualiveqarfinnik atuisut pingaaruteqartut atuisut akiliutissaannik akiliisitsinerit annertunerpaartaat nammattussaavaat, aammalu aallaaviatigut naatsorsuutigineqartariaqarpoq aningaasartuutit taamaattut atuisunut il.il. ingerlateqqinneqartassasut. *Qanorluunniit pisoqaraluarpat innuttaasut taamaattumik atuinnermut nioqqutissat, sanaartornermut atortussat, maskiinat allallu usit umiarsuarmik assartorneqartussat akiisa annikitsumik qaffaateqarnissaat misigisussaavaat.* Aammattaaq akiusut annertussusaat nunatsinni aalisakkanut nioqqutissiarineqartunut tunngatillugu aamma imaatigut ilaasunik angallassinermut billetsit akiinut, siunissami akiusut aalajangersimasut ilusilersugaanerat apeqqutaatillugu sunniisussaapput.

3. Sanaartornermut Ataatsimiititaliap ulloq 16. maj 2015 isumaliutissiissutaa § 16-imut, 21-imut aamma 24-imut nassuiaatit erseqqissarneqarnissaannik pissutissaqalersitsivoq.

*§ 16-imut nassuiaatit*

§ 16, imm. 2-imut nassuiaatini erseqqissarneqarpoq, akigitat umiarsualiviup pineqartup atorneqarneranut naleqqiullugu assigiimmik annertussuseqartitsinissaq tunngavigalugu aalajangersarneqassasut. Taamaattumik angallannermut immikkuullarissumik iluseqartumut,

angallannermut allatut iluseqartunut naleqqiullugu naapertuutinnngitsumik nammakkiisussamik, akigititassanik aalajangersaasoqarsinnaanngilaq. Tassunga atatillugu akitsuutit umiarsualivinnut tunngasut, angallannerup pineqartup suussusaani inatsisit allat naapertorlugit akilerneqartartut, eqqarsaatigineqassapput.

*§ 21, imm. 2-imut nassuiaatit*

Siunnersuummi § § 21, imm. 2 malillugu Naalackersuisut umiarsualiviup nunami atortulersuutitallip ingerlanneqarneranut aserfallatsaalineqarneranullu aningaasartuutit tamakkiisumik ilaannakortumilluunniit matussutissaannik akiliutit akiliuteqartitsinermullu tunngaviit aalajangersarsinnaavaat.

Taamaaliornikkut atuisut akiliutaat Namminersorlutik Oqartussat umiarsualiviutaanni akilersinneqartut sumiiffigisani umiarsualivinni ataasiakkaani atorneqartarnissaat siunertarineqarpoq.

*§ 24, imm. 2-imut nassuiaatit*

Erseqqissarneqarpoq § 5, imm. 1, aamma 2 naapertorlugit akuersissut kisimi taarsigassarsissutigineqarsinnaanngitsoq imaluunniit qularnaveeqqusiunneqarsinnaanani imaluunniit akiitsoqarfiusut akiliisitsiniarneranni malersuissutigineqarsinnaanani. Atortut tigussaasut talittarfittut, nunaminertatut inissiiviusartutut aamma illuutitut il.il. iluseqartut qularnaveeqqusiunneqarsinnaapput, taamatullu taakkua akiliisitsinermi atorneqarsinnaallutik.

§ 5 malillugu akuersissutip tunniunneqarnera Naalackersuisut akuersissuteqarfigisimassagaat piunasaqaataagaluartoq, akiligassaqarfiusoq atortuni aalaakkaasuni taarsigassarsinermi qularnaveeqqusiussilluni pisassaminut piviusumik qularnaveeqquteqarnissaq angusinnaavaa, tassami umiarsualivik taarsigassarsinermi qularnaveeqqusiussaartoq akiliivigineqanngippat umiarsualivik tunineqarsinnaassanngilaq. Akuersissummik pigisaqartup nammineerluni imaluunniit akiliisinnaajunnaarnermi pigisanik isumaginnittussap eqqartuussissuserisup, taarsigassarsinermi qularnaveeqqusiussaartoq akiliivigineqaaqqaanngippat atortut aalaakkaasut tunisnaassanngilaat. Qulakkeerneqarpoq umiarsualivik § 5 malillugu akuersissummik peqartoq Naalackersuisut akuersissuteqarsimanngippata tunniunneqarsinnaanngitsoq, kisianni atortut aalaakkaasut aningaasalersuineri ilaatinneqarnissaat suli ajornassanngilaq.

### **Allannguutissatut siunnersuummi aalajangersakkanut ataasiakkaanut nassuiaatit**

#### Nr. 1-imut

Inuussutissarsiornermut Ataatsimiititaliamit piunaffigineqarneq tunngavigalugu § 12, imm. 1-imi ilanngunneqarpoq ”. . . umiarsualivimmi inuussutissarsiummik ingerlataqartut

*periarfissaqartinneqarnissaasa aamma inuussutissarsiummik suliaqarnissamut periarfissaqartitsinissap qulakkeernissaanut pisussaaffeqarneq . . .*”. Naalakkersuisut inatsimmi § 1 malillugu akuersissummik tunniussinermi, umiarsualivimmi atortorissaarutit soqutigisaqartut attuumassuteqartut akornanni killilersuinertaqanngitsumik naligiimmillu unammilleqatigiittunut neqeroortigineqartassasut atugassarititaasussanik piunasaqaateqarnissamut, isummertussaassapput. Tassani ilaatinneqanngitsut tassaassapput pisut immikkut ittut, soorlu assersuutigalugu ingerlatsinissamut akuersissummik pigisaqartup salliusussaataaffectarsimasinnaanera assigisaaluunniit kiisalu Nuummi containerinut terminali nutaaq attartortitsinissaq siunertaralugu immikkut pilersinneqartussa.

#### Nr. 2-imut

§ 12-imi allannguuteqartitsinerup kingunerisaanik § 25-imi umiarsualiviup nunaminertaanni inuussutissarsiuteqarnermik suliaqarnermik ingerlatsinissamut atugassaqaqarnissamut periarfissaqaqarnissap (periarfissaannginneq) aammalu atugassaqaqarnissap naammagittaalliuutigisinaanissaanut periarfissaq ilanngunneqarpoq.

Naammagittaalliuuteqarneq akuersissummik pigisaqartumut ingerlanneqarsinnaassaaq, kisianni aamma suliaqartuusumut, umiarsualivimmi § 5 malillugu akuersissummi pineqartunut ilaasumi attartorsimasumut ingerlanneqarsinnaassalluni.

#### Nr. 3-imut

Inatsisartut inatsisaata atuutilerfissaa 1. juni 2015-inngorlugu allanngortinneqarpoq.